

## 花鉢仔種菜 江秀鳳（四縣腔）

都市人盡衰過，行來行去滿哪仔就係屋仔，屋前屋後做盡係馬膠路，行過大路脣看著一盆吊菜仔，開等吊菜色个花，過兩禮拜嘎看著纜纜吊吊幾下條吊菜仔生到萋萋，隔壁該盆辣椒仔乜共樣，兩禮拜前正看佢開白花，這下乜打到一樹个辣椒仔，有青个、有紅个 po∨ma∨ji za，對面巷仔肚个伯姆乜當煞猛，用花鉢仔種歸排仔紅菜、番薯藤，連牛角菜佢乜種到有好吃，實在還服佢哪。

後背巷仔有一個老伯姆種幾下盆拐絲、七層插、還有芙蓉生到榮榮榮，種到還靚哪！側角這片毋知麼人種幾下頭檸檬開吊菜色个花，一盆打有四、五粒就當慶仔，行啊過就會鼻著檸檬个味緒，聽鄰舍講該幾頭係香水檸檬，故所脫體香。共位還有兩頭洛神花，這頭洛神花打到盡結，葉仔跌淨淨，歸頭紅啾啾當錫人个目珠，對該行過去个人就會看一下，厓輒輒會頓恬企到該欣賞洛神花有藝術感个線條、色目，看到過癮正甘願走，桔仔就毋使講，過年過節大家就會去花市買桔仔放到屋面前，打到歸樹仔金黃金黃，像手指公恁大粒圓圓結結，滿哪就係，這係台灣人盡合意个金黃色像黃金財寶樣仔，會帶來利市發財个好運勢，尤其係做生理个人，一擺定著愛買兩盆，放到門口兩片析，出出入入看著金那那个晟光心肝肚就歡喜，桔仔个名就係好吉兆，過年時節賣花、賣桔仔、黃梨花、大酸柑、水仙花、蘭花這兜个生理人，賺錢賺到睡目就會笑。

學校脣有一細埕水溝地，有人在該種弓蕉、吊菜仔、辣椒仔、搭棚仔種笏瓜仔、明豆、還有白鳳豆、百香果（to∨kied so∨），合種幾下頭這恁久當時行个「蝶豆花」，開出青吊菜色个花又靚又鬧，揚蝶仔、揚尾仔輒輒走來翕相，佢兜種个牛角菜比對面巷仔肚个伯姆種个還較會打，當有額，因爭學校脣个水溝地直接種到泥肉肚，故所營養較有罇，生到飄飄嫩嫩當會大。講著台灣人已守規矩，打到路脣个豆仔、笏瓜仔、百香果（to∨kied so∨）纜纜吊吊，大家行過來行過去，毋識分人偷摘走，品德實在好。

講著轉角有一間自行車店，頭家娘乜盡好種東西，歸店面前種當多七層插、蔥仔、韭菜、番薯藤、桃仔、木瓜、枇杷，舊年桃仔打兩粒，佢乜盡好種花，日日春、九芎仔、海棠花，麼个就種，種到無哪好種，拿自行車頭前壞忒用毋得个車籃仔，吊到鐵窗門項種五、六頭喇叭花，年年就開到 po∨ma∨ji za，厓乜會走去翕相傳分朋友看，這就係都市人「花鉢仔種菜一無園」个心情，看起來種花種菜，毋單淨庄下人愛種，連無圍園个都市人乜會想辦法用花鉢仔種兜有个無个來過癮，分自家歡喜乜分別人看靚。

2018.5.4 半夜在大墩木棉樹下